

Paul, Galatia Whut'enne Buts'ó K'e Yanguz-i

Yak'usda ba 'ilhunaoodulhne,
Galatia yun k'ut dilhts'ine Paul hadih 'ubulhni

1 ¹ Si Paul whel'a'-un usdli. 'Aw dunene, 'enne bugha iloh 'usja, k'us 'ilhoghun dune za iloh gha 'usja. 'Et hoontsi'i Sizi Gri 'ink'ez Yak'usda neBá, 'en 'unt'oh Sizi yaidlane toh dunaidilhti, 'en gha whel'a'-un 'ust'oh.

² 'Ink'ez neulhutsinke mbene la szih dilhts'ine, 'enne ts'iyawh nohni yun k'ut Galatia ts'e Yak'usda ba 'ilhunaoodulhne 'ahli, nohni ts'iyawh hadih nohts'utni.

³ Yak'usda neBá 'ink'ez Sizi Gri neMoodihti, 'en ye unzoo-i 'ink'ez dzi dinghel-i, nohgha óonin'ai, bulh óoht'e'.

⁴ 'En 'uja nelubeshi gha huwa' dudulti. 'Et whe ndi yun k'ut ntsi'-i yuch'a naneoozdla. Yak'usda neBá, 'et whuz un'a hukwa' ninzun.

⁵ 'Ilhiz wheni ooba ts'odílhti', 'et ndo honeh.

'Aw 'uyoo khuni unzoo-i hooloh

⁶ Tube sba hooncha whe 'aht'en. Gri ye unzoo-i, 'i be dutihjih ha nohka' dani', 'et hoontsi'i 'en 'ahoh ooch'az násulhya 'ink'ez 'uyoo khuni unzoo-i nahzun, 'i ts'u násulhya.

⁷ 'Et hoontsi'i 'aw 'uyoo khuni unzoo-i hooloh. Whulohne dune nohba lhtanahuhólelh hukwa' hut'en. Gri ooghuni unzoo-i 'uts'un un'a nohba na'huyooleh hukwa' hut'en.

⁸ 'Et hoontsi'i wheni k'us yak'uz whulizas hoontsi'i, 'uyoo khuni unzoo-i 'uts'un un'a 'unt'oh-i, 'i be nohbulh yats'ulhduk de, 'et de Yak'usda hoontsi' ts'e yulhni whutoolts'it.

⁹ Nts'en'a nohts'udáni', 'et doo cha za nohts'utni, ndi khuni unzoo-i 'uda' ulhchoot, 'ink'ez mbe 'uts'un un'a nohulhni de, mbe hoontsi' 'utni-un, Yak'usda hoontsi' ts'e yulhni whutoolts'it.

¹⁰ Daja nuhzun? Yak'usda tilah k'us dune tilah ba whudósti'? Soo cho whunulh'en, dune ba 'uszoo na'duduz'i de, 'et de Gri be 'ulhna-un tisdleh, 'aw oosdle' ait'oh.

Yak'usda 'utahásalhti 'en ba whel'a'-un tisdleh

11 'Et sulhutsinke njan nohdúsní t'eeonóhzin ha ndi khuni unzoo-i be nohbulh yasduk, 'aw dune ghuni be lhe'duzusnih.

12 'Et 'aw ndi dune ts'un uschoot iloh, 'ink'ez 'aw dune whusodalh'e' cha iloh, Sizi Gri 'en gha whusunilhtan.

13 'Et whuts'o da' si lizwifne bube 'ut'en k'oh huwasna inle', 'et ts'iyawh whulh 'udahts'o. Yak'usda ba 'ilhunaoodulhne, 'enne tube dzoh nubusdeh 'ink'ez musai ubooselh hukwa 'ust'en inle'.

14 'Ink'ez stsoda'ne dahánt'e' la 'et 'onus hostun hukwa 'ist'en. 'Et whe lizwifne bube 'ut'en k'oh huwun, ndunne sulh didowhne, mbene la sundult'ohne, 'et hoonts'i ts'iyawh buba nus unzoo-un susdli' inle'.

15 'Et 'awhuz chadusda whe, 'et Yak'usda ba hoonzoo whe 'utahasálhti 'ink'ez ye unzoo-i be dutisjih ha ska' dani',

16 'ink'ez duYe' yusunilhtan. 'Et 'en ghun 'udun yun k'ut whut'enne, 'enne ndi khuni unzoo-i be bubulh yátisduk ha. 'Et sulh dizulhne 'aw huwun bubulh yalhusdih

17 ndo Jerusalem ts'e hoonts'i lhtúsyal whe ndunne, mbene la stso whel'a' unline, 'enne bubulh yalhusdih. 'Et hoonts'i yun k'ut Arabia ts'e whesya. 'Et hukw'elh'az doo cha za keyoh Damascus ts'e naoozúsja.

Dat'en keyoh whuti Jerusalem ts'e

18 'Et tat yus k'ut hukw'elh'az, 'et ndo Jerusalem ts'e whesya. Peter 'en tis'elh ha 'ink'ez whunizyat 'on 'at kwulat dzin oozih usda.

19 'Et 'onghohne whel'a'ne, 'enne 'aw lhubus'el. NeMoodihti bulhutsin James, 'en za 'us'en.

20 'Ink'ez ndi nohts'o k'esges-i, Yak'usda nalh 'unohdúsní, 'aw lhozusts'it.

21 'Et hukw'elh'az yun k'ut Syria 'ink'ez Cilicia, 'oh ho nususya.

22 'Et Judea yun k'ut ts'e, mbene la Gri ba 'ilhunaoodulhne, 'enne 'awhuz sulh luhis'en.

23 'Ants'i sulh 'uhudants'o. Ndiz un'a hodants'o, "Whuts'o da' dzoh nuneulhdzut inle'-un, 'en 'awet be 'alha 'uhoont'oh-i ghun, ts'iyanne khuni unzoo-i be bubulh yalhduk suli', 'uda' musai yoolhtselh hukwa' yalh'en hoonts'i."

24 'Ink'ez si sgha Yak'usda hudálhti'.

Khuni unzoo-i ts'ih'un un'a ooghu yasduk

2 1 'Et whunizyat 'on 'at dit yus k'ut hukw'elh'az, Barnabas bulh doo cha ndo Jerusalem ts'e natit'az. Titus 'en cha uschoot 'ink'ez nebulh tiz'az.

2 Senghun ne'whults'ut-un, 'et huwa doo cha za Jerusalem ts'e nunásusja whe Jerusalem 'et whunilhchoh 'ubudásni'. Ndi khuni unzoo-i, 'i be ndunne 'udun yun k'ut whut'enne bubulh yasduk, 'et whunilhchoh 'ubudásni'. 'Ink'ez nchane unline, 'enne whu'iz 'et bubulh yasduk. 'Et whe 'aw 'ants'et lhe'úst'el whuzdli'.

3 'Et hoonts'i Titus, sulh 'ut'en-un, 'en Greek whut'en-un unli, 'et hoonts'i 'aw yuka dune unli-i hitit'us whuts'un lhehinilht'i.

4 Whulohne neulhutsinke na'hududil'i. 'Enne bugha 'uhooja nunút'i' be netabonínla. Neghu hoole' ha dats'int'oh whe dune tsinli. Gri Sizi 'ants'i nek'unan'oh ne'le'neyinla. Wheni doo cha Moses be 'udustl'us k'ut 'i be 'ulhnane nehoollhtselh hukwa' hut'en.

5 'Et hoonts'i ndunt'ohne 'aw 'ilhoh sadzi ook'oh whuntát'oh 'et hoonts'i butl'a 'uzdudooyelh ait'oh. 'Et whe ndi khuni unzoo-i be 'alha 'uhooht'oh-i, 'i be whuz un'a za ooht'e'.

6 'Et ndunne nchane unli buts'utni, 'enne lhgha za ubunus'en. Mbe hinli 'et hoonts'i sba dalhúhit'oh. Yak'usda nalh lhgha za 'uts'int'oh 'et huwa.

7 'Et hoonts'i Peter ndi khuni unzoo-i yutl'a idan'ai whe 'i be yuka dune unli-i k'ut huyuzt'usne, 'enne bubulh yatilhduk ha, 'et whuz un'a si cha ndi khuni unzoo-i stl'a idan'ai, 'i be 'udun yun k'ut whut'enne bubulh yaóosduk ha. 'Et ndunne nchane, 'enne ts'iyawh ts'ih'un un'a t'ehonanzin.

8 Nts'en'a Yak'usda Peter lizwifne buba whel'a'-un yulhtsi, 'et whuz un'a si cha 'udun yun k'ut whut'enne buba whel'a'-un sulhtsi 'et huwa.

9 'Inka James, Cephas, 'ink'ez John, 'enne buts'utni keyoh whuduchun unline, 'enne ndi ye unzoo-un 'et stl'a hón'ai, 'et ts'ih'un un'a t'ehonanzin, 'et de Barnabas 'ink'ez si cha 'et huwa nela nahúz'ai.

'Et whuz un'a ts'iyanne whúbuznilhtan, wheni 'ink'ez James, Cephas 'ink'ez John te lhulh 'uts'int'oh za búznidulh. Wheni 'udun yun k'ut whut'enne buts'úztidulh, 'ink'ez 'enne Lizwifne buts'u hutidulh.

10 Mbe la tel'enne, 'enne 'aw bunalh ts'odulhnoh 'et za hukwa' huninzun, 'ink'ez si cha whuz un'a hukwa' nuszun.

Moses be 'udustl'us 'aw doo cha ook'une' ts'oot'en huba lhe'hóot'oh

11 'Et Peter 'oh da' keyoh Antioch ts'e oozya whe 'uts'un un'a 'uja. 'Et huwa oonin ts'e dásni'.

12 Whulohne James yulh 'ut'enne, 'enne keyoh Antioch nehútidulh whutso, Peter 'udun yun k'ut whut'enne 'ahoolhiz bula 'á'alh.

'Et hoonts'i James yulh 'ut'enne whusahándil whe, 'et Peter buch'a nasja. Ndunne Lizwifne bube nuljut 'et huwa.

13 'Ink'ez 'onghohne Lizwifne, duba na'udzoo'ne 'enne cha Peter bulh buch'a nahusdil. 'Ink'ez Barnabas, 'en hoonts'i, hinalh nduhút'en 'ink'ez 'en cha bubundul'en suli'.

14 Ndi khuni unzoo-i 'alha' 'unt'oh-i, 'i daja ni, ndunne Lizwifne 'aw ts'ih'un hik'ú nulhe'ust'en. 'Et nawhus'ai whe, ts'iyanne nalh 'et hukwa Peter njan dúdusni, “Nyun Lizwif 'int'oh 'et hoonts'i 'udun yun k'ut whut'enne k'un'a dune inli. 'Ink'ez di ha 'udun yun k'ut whut'enne Lizwif k'un'a dune hoole' hukwa' bilh'en?”

15 Wheni Lizwif tsinli whe ts'uwhuzdli. 'Aw 'udun yun k'ut whut'enne k'un'a lhe'ts'ít'oh.

16 Moses be 'udustl'us 'i gha za 'uts'ut'en de, 'aw ts'ih'un dune lhts'iloh. Sizi Gri neba 'alha' 'unt'oh 'et huwa ts'ih'un dune tsinli 'et t'ets'oninzun. 'Ink'ez Gri Sizi 'en neba 'alha' 'unt'oh-un unli 'et whe Gri neba 'alha' 'unt'oh-un, 'et 'i be ts'ih'un dune ts'uzdli'. Moses be 'udustl'us k'une' 'uts'ut'en de, 'aw 'et huwa iloh ts'ih'un dune ts'uzdli'. Moses be 'udustl'us k'une' 'ut'enne, 'aw 'ilhoghun hoonts'i ts'ih'un un'a lhe'ínel 'et huwa.

17 Wheni Lizwifne, Gri 'en be ts'ih'un 'unt'ohne ts'oole' 'et za hukwa' 'uzninzun de, 'et hoonts'i lubeshi 'ulh'enne tsinli, 'et nats'uhoon'ai de, Gri 'en cha eh lubeshi ts'u nóhnilht'i unli? Nts'en'a 'uwhutát'elh? 'Aw 'uhót'e' ait'oh!

18 'Et ndi Moses be 'udustl'us k'ut 'udun nenúsdla 'ink'ez doo cha za náschoot 'ink'ez ook'une' tist'en de, 'et de khuni k'unusyuz whe' tiselh.

19 Moses be 'udustl'us k'ut, whulh dasúsai le 'ust'oh, 'aw 'on 'at ook'ú nulhe'tuzist'el 'et huwa. 'Et whuz un'a Yak'usda ba khusna za' tist'elh.

20 Gri tulalghus k'ut bulh dasusai le 'ust'oh, 'et 'aw 'on 'un lhuhúsnoh le 'ust'oh, 'et hoonts'i Gri syudinda. 'Ink'ez ye khuna-i, 'i be khusna. Yak'usda ooYe' sba 'alha' 'unt'oh-un, 'et 'i gha yun k'ut khusna. 'En 'uja sk'entsi' k'et sba whutl'a' dudilti.

21 'Aw Yak'usda ye unzoo-i 'aw 'udun neoos'alh ait'oh! Moses be 'udustl'us k'ut, 'i be ts'ih'un dune ts'oole' ait'oh. 'Et whuz un'a 'uhoont'oh de, 'et Gri 'ants'et whe neba dazsai le'whutat'elh,” Peter 'et ndudúsni.

Be 'alha' 'uhoont'oh-i, 'i be za Yak'usda nalh ts'ih'un dune ts'uzdli'

3 1 O Galatia whut'enne whuzahni! Mbe duyun-un nist'i whe nohnan'a ndi khuni 'alha' 'unt'oh-i ook'u nulhé'zooht'en ha? Nohnich'oh Gri tulalghus k'ut neba dazsai-un, whunilh'en le' hoont'oh. 'Et whuz un'a nohba be hóodat'en.

² 'Ilhoghun 'et sudutáhnélh hukwa' nuszun. Nts'en'a Ndoni nohyudílt's'ut? Moses be 'udustl'us ook'une' 'uht'en k'us whudahts'o-un tilah nohba 'alha 'uhoont'oh?

³ Whuz un'a stabe whuzahni! Ndoni 'en be whe' daht'en. 'Ink'ez 'andit nohyust'e dalh'en-un, 'et whuz un'a ts'ih'un 'unt'ohne tihleh, nahzún eh? 'Awundooh!

⁴ Nohni lhat-un whe dzoh nusahde whe' hoont'oh. 'Et ndúwhulcho whe 'ants'i 'uhoont'oh nahzun eh? 'Et nts'en'a 'ants'i nohba 'uwhutát'elh!

⁵ 'Et huwa Yak'usda Ndoni nohyeídan'ai 'ink'ez nohtoh huwa 'it'en tune! 'ut'en. Di ha 'uhoonla? Moses be 'udustl'us ook'une' 'uht'en k'us ndet whudahts'o-un nohba 'alha 'uhoont'oh?

⁶ Abraham Yak'usda yuba 'alha' 'unt'oh whe Yak'usda ts'ih'un dune unli yúlhni,

⁷ 'et whuz un'a nohni cha ts'ih'un un'a t'ewhunoozhéh 'et nohts'u hukwa' nuszun. Mbe oobe 'alha 'uhoont'oh 'ut'ine, 'enne za Abraham buzkeh hinli.

⁸ Yak'usda ooghuni nus de dawhútanelh, 'et whunénulhtun. Be 'alha 'uhoont'oh-i, 'i be Yak'usda 'udun yun k'ut whut'enne ts'ih'un 'unt'ohne ubutilhtselh. 'Et whutso 'uwhutánelh-un, 'et Yak'usda Abraham njan ndúyulhni, “Nyun ngha 'udun yun k'ut whut'enne, ts'iyawh dáwhuldzoo'-un bugha hóotalts'ulh.”

⁹ 'Inka Abraham Yak'usda yuba 'alha' 'unt'oh 'et huwa 'uk'enus hoonzoo-un oogha whults'ut. 'Ink'ez mbe la Yak'usda ooba 'alha' yint'ohne, 'enne cha whuz un'a za njan 'uk'enus hoonzoo-un bugha hóotalts'ulh.

Moses be 'udustl'us 'i be 'aw dune Yak'usda nalh ts'ih'un hoole' ait'oh

¹⁰ 'Et Moses be 'udustl'us yut'a ninintanne, 'enne ts'iyawh Yak'usda musai butilhtselh-un, 'et whuts'e' hut'en. 'Et ndiz un'a 'uk'e hóoguz whe ndutni, “Moses be 'udustl'us, 'uk'e yanguz-i, 'i ts'iyawh mbene la ts'iyawh hik'u nulhe'ust'en de, 'et de musai ubutilhtselh-un, ts'iyawh huwhuti'elh.”

¹¹ 'Ink'ez ndi Moses be 'udustl'us 'i be 'aw dune Yak'usda nalh ts'ih'un 'uhoot'e' ait'oh. 'Et Yak'usda ooghuni njan ndutni, “Mbene ts'ih'un 'unt'ohne, 'enne be 'alha 'uhoont'oh-i, 'i be ts'ukhuna.”

¹² 'Et Moses be 'udustl'us be 'alha 'uhoont'oh-i 'aw 'i gha iloh. 'Et mbe dune Moses be 'udustl'us yuk'une' 'ut'en de, 'et de 'i be 'et whuz un'a ndi yun k'ut hukhutinalh.

¹³ Mbe Moses be 'udustl'us k'unyisne, musai hoole' huba' hoont'oh. 'Et whuch'a Gri naneoket. Ndet musai netilhtselh-un dich'oh k'é hoot'ai.

'Et whuz un'a 'uk'e honguz whe ndutni, “Mbe duchun undunilt'o-un, 'en musai tileh whe 'unt'oh,” ni.

14 'Et huwa Abraham dawhuldzoo'-un ooghá whults'ut, 'udun yun k'ut whut'enne, 'enne cha Gri Sizi gha bugha whútalts'ulh. 'Et neba 'alha 'uhoont'oh-i, 'i be Ndoni nets'u yoozi neyudoolds'tit ha.

**Yak'usda ndet la khuni neba lhaídanla-i,
'aw 'ats'un un'a nahótneh ait'oh**

15 Sulhutsinke ndi yun k'ut dune k'un'a 'et huwun nohbulh yasduk. Nduinne lhk'oh ts'e nehónin'ai de, 'et huwun lhgha huhoont'i' 'ink'ez 'uk'e hooguz de, 'aw dune 'udun nehóho'alh ait'oh. 'Ink'ez dune 'udun whutanahahó'alh-un ait'oh.

16 'Et Yak'usda Abraham 'ink'ez oots'u ha yánzut-un, ndai ye yuts'u náhizya, 'aw 'en za 'ink'ez oots'u ha yánzut-un, 'enne za but's'ú yoozi. 'Aw Abraham ts'u haíndene, 'enne iloh 'ubudusni. 'Aw lhane iloh 'ulhni. 'Et hooonts'i Yak'usda 'ilhoghun dune za ghu yalhduk whe 'utni. 'Et whuz un'a 'udija whe Abraham, “Nts'u haínzut-un,” yúlhni. 'Ink'ez ndun Gri 'en Abraham ts'u hainzut-un 'unt'oh.

17 Daja nohdusni-un, 'et ndi khuni be yuts'u náhizya, 'uda! Yak'usda Gri bulh lhahódinla whe' hoont'oh. 'Et 430 be yus k'ut hukw'elh'az 'et Moses 'udustl'us 'uk'u neyuzguz. 'Et huwa njan Abraham khuni ooba lhaíndanla-i, ndi khuni 'aw gak nahooselh ait'oh.

18 'Et Yak'usda yut'i-i negha ítalelh-i, nts'en'a Moses be 'udustl'us gha negha ítalelh? Gak! 'Aw 'uhot'e' ait'oh. 'Et hooonts'i Yak'usda Abraham yuts'u náhizya-un, 'i be yughá whunin'ai.

Moses be 'udustl'us 'i ndet huba unzoo?

19 'Et Moses be 'udustl'us ndet huba 'uzoo' nahzun? Ninta' ts'ut'ih-un 'et whuch'a neba 'uhóonla. 'Ink'ez nkede 'uwhutánelh whe whusawhútilts'ulh, Abraham oots'u ha yánzut-un whusatiyalh whuts'un, 'et whuts'un neba' hóonla. 'Ink'ez mbe yuts'u haínzut-un, ndi yé nets'u nahizya-i, 'en ghun 'uhoont'oh. 'Et mbe la dune eguz unli-un, 'et lizas daja hidáni'-un, 'et 'on 'un budáni'.

20 'Et mbe dune eguz unli-un, 'aw 'ilhoghun za ba lhe'ít'oh. 'Et hooonts'i Yak'usda 'en 'ilhoghun za unli.

21 Daja nahzun? Moses be 'udustl'us 'ink'ez Yak'usda Abraham yuts'u nahizya-un, 'et lhgha' 'uts'un un'a eh 'unt'oh? 'Awundooh! 'Et hooonts'i Moses be 'udustl'us daja ni, 'et butl'a hón'ai. 'Et 'i be dune 'ilhiz wheni hukhuna de, 'et de 'alha' Moses be 'udustl'us 'i be dune ts'ih'un un'a 'uhint'oh hutileh inle'.

22 'Et hoonts'i Yak'usda ooghuni ndutni, ts'iyanne dune lubeshi bulh 'uhint'oh inle'. 'Et ndi ye but's'u náhizya-i, 'i mbe Sizi Gri buba 'alha' yint'ohne, 'aw 'enne za bugha whútakulh.

23 'Et hoonts'i be 'alha 'uhoont'oh-i 'uztit'elh whutsoda', Moses be 'udustl'us 'i be 'ants'i 'azdanla' le' ts'ant'e'. 'I be duts'o nehulh'tsi, nkede be 'alha 'uhoont'oh-i buneuntitun 'et whuts'un.

24 'Et huwa Moses be 'udustl'us nehodalh'e'-un inle'. 'Et whe Gri ts'un neozdla. 'Ink'ez be 'alha 'uhoont'oh-i 'i be ts'ih'un dune ts'oole' ha.

25 'Et be 'alha 'uhoont'oh-i ts'ut'i. 'Et huwa ndi whuneodalh'e'-un 'aw 'on 'un ook'une' ts'oot'en huba lhe'ít'oh.

Nohni ts'iyawh Gri Sizi 'en be 'ilhoghun za 'ahli

26 'Et nohni ts'iyawh Gri Sizi 'en gha 'et be 'alha 'uhoont'oh-i, 'i be Yak'usda buzkeh 'ahli.

27 'Et nohni nohtoh mbene Gri ba too be 'ulyane, bulh 'áht'oh sahli'.

28 'Inka 'aw lizwifne k'us 'udun yun k'ut whut'enne hooloh. 'Ink'ez 'aw 'ulhnane k'us oola naditnine cha hooloh. 'Ink'ez 'aw dune k'us ts'ekoo cha hooloh. Nohni ts'iyawh Gri Sizi 'en bulh 'ilhoh 'aht'oh.

29 'Et Sizi Gri oodune' 'ahli de, 'et Abraham ts'u haindene cha 'ahli. 'Ink'ez ndi Yak'usda Abraham ye yuts'u náhizya-i, 'i gha ts'iyawh nohts'u whutikulh.

Dune 'awhuz ts'oodun unli de, 'ants'i 'ulhna-un unli le' 'unt'oh, 'et hoonts'i 'ilhudzin moodih tileh

4 ¹ 'Et ndiz un'a nohdusni, mbe la 'uk'elhutizulh-un, 'en 'awhuz ts'oodun unli de, 'ants'i 'ulhna-un unli le' 'unt'oh, 'et hoonts'i 'ilhudzin moodih tileh.

² Nkede la oobá yuba hoozi-un whusawhútilts'ulh 'et whuts'un, yughunline 'ink'ez yoh huwundline, 'awhuz highunli.

³ Wheni cha 'et za 'et duts'ánt'e'. Ts'oodunne nduts'ult'oh whe 'uts'ant'e'. Ndi yun k'ut 'ut'en be tank'us úznant'i. 'Et huwa ndi yun k'ut whe 'ulhna ts'anle'.

⁴ 'Et hoonts'i whusahóolts'ut whe Yak'usda duYe' whusayálh'a'. Ts'eke 'en yulh'tsi, Moses be 'udustl'us yuk'úne' tit'en ha.

⁵ 'Et whuz un'a mbene Moses be 'udustl'us k'úne' 'ut'enne, 'enne ts'iyawh nabonket. 'Et whe wheni Yak'usda buzkeh ts'oole' ha.

⁶ 'Ink'ez Yak'usda buzkeh sahli'. 'Et huwa Yak'usda duYe' ooyughi, 'en nohts'un whusayálh'a', nohdzi yoh ooda' ha. Tube cho "Abba" ni. 'UBá ni whe 'utni.

7 'Et huwa 'aw 'on 'un 'ulhnane lháhloh, 'en buzkeh sahli'. 'Ink'ez buzkeh sahli' de, 'et Gri 'en gha Yak'usda yut'i-i nohch'e' tileh.

**Paul Galatia whut'enne 'ubulhni, "Et nohba whénuzjut!
'Oh da' nohba 'uwhúsdla-un, 'et 'ants'i 'ist'en whutaleh"**

8 'Et hoonts'i niz de whudizulh da' 'aw Yak'usda t'enuzahzun inle'. Whulohne Yak'usda lhílohne, 'enne hoonts'i buba 'ulhnane 'aht'oh inle'.

9 'Ink'ez 'andit 'awet Yak'usda t'enihzin, k'us ndiz un'a tilah 'udoosni', Yak'usda nohni ts'iyawh soo cho t'enohtanzin. 'Et di ha nohni doo cha ndai la ndi yun ye tetsun-i, 'ink'ez lhe'ízoo'-i, 'i ts'iyawh oots'u nátilhye hukwa' 'aht'en? 'Ohwhi doo cha za eh be 'ulhna tihleh hukwa' nahzun eh?

10 Lhe'uht'en! Whuloh dzin, sanun te, 'ink'ez hoonli nts'owhuya whudizulh k'us whulukhun yus k'ut cha, 'i ts'iyawh neba whudiziti' duhni!

11 'Ants'i 'et tilah nohba 'ist'en, 'et huwa nohba whénuzjut.

12 Sulhutsinke nohni nohts'un tedusdlih sk'un'a oot'e' ha. Nohni si nohk'un'a 'ust'oh 'et huwa. 'Aw hoonli whe sulh lhundúlhdal.

13 T'eeonahzun bé syust'e tetsun-i, 'et huwa soo 'udechoo ndi khuni unzoo-i be nohbulh yasduk inle'.

14 'Ink'ez nts'en'a la syust'e be dzoh nuszut, 'et hoonts'i nohba dalhúhoot'oh. 'Et huwa 'aw tenásulhnahyulh. 'Et hoonts'i Yak'usda oolizas usdli nohba le 'ust'oh. 'Et whuz un'a nohyoh ts'e dasunulhti. Gri Sizi 'en nohba le 'ust'oh, 'et huwa 'anih sudahni.

15 Ndet whe ndi 'uk'unus hoonzoo-un nohgha whults'ut? 'Et dáhooja? Ts'ih'un un'a 'unohdusni, nohna ha níhla 'ink'ez da' sgha nóhlelh oole' da'.

16 'Et dahooja? Ts'ih'un nohdusni. 'Et huwa nohch'az nedisja nahzun eh?

17 'Et 'uyoonne nunút'i' be kxanóhonot'ah hukwa' hut'en, buts'un nenádohdil ha. 'Et 'udun nenohoninla. 'Et la buka' nooszin ha.

18 'Et ts'ih'un 'uhoont'oh-un, 'et soo cho hukwa' 'aht'en nohbulh 'ust'en k'us 'aw nohbulh lhe'zúst'en 'et hoonts'i.

19 Suzkehke nkede whusaootilts'ulh soo ts'ih'un un'a Gri nohbulh 'utit'elh 'et whuts'un, 'ants'i ts'oodun ha sulh 'ults'ulh nohba le 'ust'oh.

20 'Andit 'aho nohbulh 'utist'elh hukwa' nuszun. 'Et khuni 'uts'un un'a nohbulh yaoosduk hukwa' nuszun. Nohbulh nawh 'unuszun 'et huwa.

**Nane ts'ekoo, Sarah 'ink'ez Hagar,
'enne nawh hukw'un'a khuni neba lhadulya-i hinli le' hint'oh**

21 Nohni mbe 'ahli whe Moses be 'udustl'us ook'une' tiht'en hukwa' nuhzun, 'et suduhni, ndi Moses be 'udustl'us daja ni la, soo ts'ih'un un'a t'eeonúhzun eh?

22 'Et ndiz un'a 'uk'e yanguz whe njan ndutni, Abraham nane buzkeh ooye'ke, 'ilhoghun, 'en 'ustle-un, 'en ooyaz. 'Et 'ilhoghun 'aw 'ustle-un lhíloh, 'en ooyaz.

23 'Et hoonts' ndun ts'eke 'ustle-un ooyaz, 'en neyust'e k'oh ts'e whuzdli. 'Et hoonts'i ts'eke 'ustle-un lhíloh ooyaz, 'en Yak'usda Abraham yuts'ú hoozi, 'et hukw'un'a whuzdli.

24 'Et ndi 'i ts'iyawh oogha ne'tsut'en-i neba unli. Njan dahoont'oh whe ndunne ts'ekoo 'enne nawh hukw'un'a khuni neba lhadulya-i hinli le' hint'oh. 'Et ndi 'ilho khuni, 'i dzulh Sinai ts'un hadilts'ut-i le 'unt'oh. 'Ink'ez mbene la 'et whuzdline, ts'iyawh 'ulhnane hinli. 'I nyoon ts'eke 'ustle-un Hagar huyulhni, 'en k'un'a 'unt'oh, ni whe 'utni.

25 Ndiz un'a njan dúhoont'oh, ndun ts'eke Hagar, 'en ndi dzulh Sinai, yun k'ut Arabia ts'uwhutni-un, 'et whuz un'a 'unt'oh. 'Ink'ez njan keyoh Jerusalem, 'et ndun Hagar k'un'a 'uhoont'oh. Njan keyoh, 'et 'ulhnane keyoh 'uhoont'oh. 'Ink'ez mbene 'et whuzdline, 'enne ts'iyawh 'ulhnane 'uhint'oh.

26 'Et hoonts'i 'udun keyoh Jerusalem ndo yak'uz 'uhoont'oh, 'et 'ulhnane keyoh lhe'hoot'oh 'ink'ez wheni ts'iyawh njan keyoh neloo 'uhoont'oh le' hoont'oh.

27 'Et whe Yak'usda be 'udustl'us k'ut 'et ndutni,
"Whunilhni ts'eke!

Nyuzkeh hooloh. Nyun 'int'oh 'aw nyuzkeh hóle' ait'oh.

'Aw nyaz whutaleh hukw'un'a whéldintnih. 'Awet hootánt'e!
Tube cho hoonáht'i! Mbe buzkeh hooloh-un, 'en ooki
hoonli-un, anus buzkeh lhái tileh 'et huwa," ni.

28 'Et sulhutsinke, wheni Isaac k'un'a 'uts'int'oh. Wheni cha Yak'usda Abraham yuts'u hoozi-un, 'en buzkeh tsinli.

29 'Et hoonts'i 'oh da' ndun neyust'e k'oh ts'e whuzdli-un, 'en Ndoni ye ulhtus-i be whuzdli, 'et ndet huwa dzoh nuyulhdzut 'et 'andit dzin 'awhuz 'et za neba ndúhoont'oh.

30 'Et hoonts'i Yak'usda be 'udustl'us daja ni la? 'Et Sarah Abraham njan yulhni, "Et 'ustle-un ts'eke, duye' bulh tenabuninyoot. 'Alha' ndun 'ustle-un ts'eke ooye', 'aw nk'elhe'toolelh ait'oh. Ts'eke 'ustle-un lhusdloh, sye' 'en za nk'élhe'tilelh," yulhni.

31 'Et huwa sulhutsinke wheni 'aw 'ustle-un ts'eke buzkeh lhts'iloh. 'Et 'ustle-un ts'eke lhiloh-un, 'en buzkeh 'uts'int'oh.

Gri ye nék'un'a 'an'oh-i, 'i be 'et whuz un'a nelanaditni.

'Et whe whulh núdolhya'

5 1 'Et huwa ndi Gri ye nék'un'a 'an'oh-i, 'i be 'et whuz un'a nelanaditnih. 'Et soo cho whulh núdolhya'. 'Aw 'on 'at 'ulhnane k'un'a oolghel junih.

2 Soo zulhts'ai. Si Paul njan nohdusni, 'et nohni ooka dune 'ahli-i k'ut nohotit'us de, ndet Gri nohba 'uhoonla-un, 'aw hoonli nohba lhuhooholeh tileh.

3 Doo cha za whunoh untistun. Mbe la dune yuka dune unli-i k'ut huyuzt'us de, 'et ndunt'oh dune, 'en Moses be 'udustl'us, 'i ts'iyawh yuk'une' oot'en huba' hoont'oh.

4 Nohni ndi Moses be 'udustl'us 'i be Yak'usda nalh ts'ih'un un'a ooht'e' hukwa' 'aht'en de, 'et de Gri ooch'a nasulhye whe 'aht'en. Ye unzoo-i, 'i cha ooch'a sahkata whe 'ahja.

5 Ndoni gha za wheni ooka tse ts'úhooli whe ts'ih'un un'a whe dune ts'oole' ha, 'et huba ts'ilh'i 'et huwa.

6 'Et wheni ts'iyawh Gri Sizi 'en bulh 'uts'int'oh de, 'et de yuka dune unli-i k'ut huyuzt'us, k'us 'aw lhit'us-un, 'et 'aw 'ants'i 'uhoont'oh. 'Et hoonts'i be 'alha 'uhoont'oh-i, 'i hooncha whe' hoont'oh. 'I gha 'on nus lhk'e ts'utsi'.

7 Soo úlhwas inle'! Mbe gha njan khuni 'alha' 'unt'oh-i ooch'a nasahdil?

8 Ndun nohoolhgooh-un, 'aw 'anih nohulhni-un, 'en ts'un iloh 'unt'oh.

9 Lhes oogha untuldoh-i, ntsool-iyaz 'i lhes ncha-i oogha yuntuldoh.

10 NeMoodihti sba 'alha' 'unt'oh 'aw 'uts'un un'a 'unoohzin ait'oh.

Mbe dune tank'us nohnilt'i-un, 'en mbe unli hoonts'i, Yak'usda yuba nahutiye.

11 'Et sulhutsinke ndi ooka dune ulhli-i 'awhuz hiyot'as dusni de, 'awhuz 'et za ndudúsní de, 'et dí ha 'awhuz hukwa dzoh nusulhdzut? 'Et whuz un'a howu yasduk de, 'et Sizi Gri tulalhgus k'ut dazsai-un howu yasduk de, 'aw da' buba dzoh lhe'duzoosnih oole'.

12 Mbene la tank'us nohnilt'ine, 'enne didutch'oh úncha na'hoodudut'as.

13 Sulhutsinke Moses be 'udustl'us hik'úne' 'ust'enne oola naditnine 'ahli whé 'aht'oh. 'Et hoonts'i 'aw 'ilhoghun za nohba whuz'ai. Ndi whe oola naditni-un 'et whaht'i, 'et hoonts'i soo cho khohdle'. Nohyust'e ninta' tit'el'oh-un, 'et whuts'u nint'i de, 'et hólhchoot junih! 'Et k'us be nék'ets'insi'-i, 'i be lhba ne'óht'en.

14 Moses be 'udustl'us 'et whunílhcho 'ilho khuni be lhaooduja, 'et ndutni, “Nts'en'a la nyunch'oh k'e naintsi', whuz un'a nyulh dune cha buk'eoontsi,” ni.

15 'Et hoontsi'i 'ants'i lhike k'un'a lhehdulh de, doo ka si ninta' lhóh'en. 'Et whuch'a huwohle'!

Ndoni 'en be ndi yun k'ut dulhts'i

16 'Et njan nohdusni, Ndoni 'en be ndi yun k'ut dulhts'i. 'Et nduht'en de, nohyust'e 'uts'un nóot'i ait'oh.

17 'Et neyust'e Ndoni ch'az nín'ti. 'Et doo cha Ndoni neyust'e ch'az nín'ti. 'Et whe lhch'a húhool'i. 'Et huwa hukwa' nahzun te, ne'ooht'en junih.

18 'Et Ndoni 'en za ook'oh tune' 'aht'en de, 'et de Moses be 'udustl'us daja ni, 'aw 'on 'un k'únunoh noojoot ait'oh.

19 'Et neyust'e be 'ut'en k'oh-un, 'et whunilhchoh t'ets'oninzun. 'Uyoonne 'at bulh ninta' ts'ut'ih, k'us lhghu lhikohne, 'enne bubulh ninta' ts'ut'ih, k'us lubeshi dutsun-i 'uts'ulh'ih. 'Ink'ez 'ahoolhyiz dune k'us ts'ekoo bulh lubeshi 'uztilelh whuts'úznint'i.

20 'Et 'uk'eltsi neba 'alha' 'unt'oh-un, dune dezduh-un cha. Lhts'uzdutni 'ink'ez lhch'a ts'úhooli. Lhghe' ts'oolnih, ts'uhuzke, nek'oh ts'e za' 'uts'it'elh. 'Et lhelhdoh 'uts'int'oh whe 'ilho didohne, wheni ts'iyawh whenich'oh nek'un'a 'onghohne whubuts'odulh'eh de,
21 'uyoonne dune ch'e' ha' 'uzninzun 'ink'ez dune ts'ughan. 'Ahoohyiz taznutnai 'ink'ez ts'iyantsuk whe hoontsi' tune' ts'ut'en. Ndi ndunt'oh-i, 'ink'ez ndet la tank'us neyust'e whuts'u nint'i-un, 'et whutso nohdusni, 'uda' cha nohdasni!. Mbene la 'et ndúhoont'oh tune' 'út'enne, 'aw Yak'usda whulerwe unli-un, butl'a hóolts'it ait'oh.

22 'Et hoontsi'i Ndoni neba' yinla-i, 'i 'unt'oh, be lkh'e ts'utsi-i, be ts'ónilhni cha, be nédzi dizghel, hoonli talhts'odini-un, 'ink'ez 'uyoonne ts'un ts'ínzoo 'i cha. 'Et ts'iyaitsuk unzoo-i 'uts'ulh'en, Yak'usda neba 'alha' 'unt'oh-un cha.

23 'Uyoonne gha' ts'ole', 'ink'ez k'o 'uzdunoolt'i. 'Et nduts'int'oh de, 'et de 'aw hoonli whe nek'e hootalts'ulh-un hooloh.

24 'Ink'ez mbene Gri ooch'e' unline, 'et dáhoont'oh neyust'e lubeshi ts'u nint'i, 'et 'ants'i lubeshi ts'uznint'i-un le' ts'int'oh, 'et ts'iyawh tulalhgus 'uts'odunilht'o.

25 Ndoni 'en be ts'ukhuna. 'Et huwa Ndoni 'en be za bulh 'úztoodilh huba' hoont'oh.

26 Khun te whe' dudolhti' junih, ts'úhoske' junih, 'ink'ez 'uyoonne ch'e' ha' 'uznoozin junih.

Ndet huwa whúlna'-un lhla 'aht'en

6 ¹ Sulhutsinke nohi Ndoni k'une' 'ut'enne 'aht'oh, 'ink'ez mbe la nohtoh lubeshi be ulhgooh-un, 'en nalhchoot. Nánilhtsul ts'ih'un nenánulhtih. Nohnich'oh na'dunulh'en, doo ka si nohni cha tank'us nóoht'i.

² 'Ilhone 'ahli ndet la nohba howa whulna' hoonts'i lhla ooh't'en. 'Et de la Gri, ooghuni net'l'a dílts'ut-i, ook'une' tiht'en whe' hoont'oh.

³ Mbe la hoonli 'ust'oh na'dunudzun-un, 'en dich'oh na'dunut'ah. 'Aw hoonli lhiloh whe 'unt'oh 'et huwa.

⁴ 'Et 'ilhoghun 'ahli whe dude 'ut'en k'oh soo cho honoolh'en. 'Et 'ut'en unzoo-i 'inla de, 'et la didutch'oh duba hót'e', 'ink'ez 'aw 'uyoonne ba iloh.

⁵ 'Ilhone tsinli whe whenich'oh ne-e'ut'en 'uts'oolh'en huba' hoont'oh.

Tube cho dahzoo 'ink'ez hoonzoo tune' 'aht'en

⁶ 'Et mbe la Yak'usda ghuni hodulh'eh-un, 'en mbe la whuyodalh'e'-un, 'en ndai la unzoo-i yut'i, 'i yuloh ye yula' oot'en huba' hoont'oh.

⁷ Khun nanooht'ah junih. 'Aw Yak'usda ooghoohdloh ait'oh. 'Et ndai la dune 'ainulih-i, 'i za ha yuntilelh whe 'unt'oh.

⁸ 'Et nts'e la dune ooyust'e nint'i ts'e, 'et ooyust'e whuts'u nint'i-un, whuz un'a datitsah. 'Et hoonts'i mbe la Ndoni yunilht'i k'un'a ne'ut'en-un, 'en Ndoni gha 'ilhiz khutinalh.

⁹ 'Et hoonzoo-un 'uts'uwhulh'en 'et huwa néznotsilh junih. 'Et 'aw whula lhts'udustni de, whusahóolts'ut de, 'et de ha 'úznoolelh.

¹⁰ 'Et huwa negha whultsuk te, 'uyoonne la' ts'oot'en. Mbene la be 'alha 'uhoont'oh unline, 'enne 'uk'enus bula' ts'oot'en huba' hoont'oh. 'Et 'ilhoh 'uts'int'oh whe' ts'int'oh.

Sizi Gri tulalhgus k'ut dazsai-un, 'et whe ts'ohót'e'

¹¹ Ndi nulh'en sich'oh nohts'o k'e usguz-i 'unt'oh. Lhelcho susi whe ook'u ne'zuguz.

¹² 'Et mbene la ooyust'e 'et huba soo 'uldzoo'ne, 'enne 'et hukwa' hut'en, 'enne 'uhint'oh, nohni ooka dune 'ahli-i k'ut nohotit'us whuts'u nohonilht'i. 'Et njan huwa hut'en, Gri tulalhgus k'ut neba dazsai-un huwa yats'ulhduk-un, 'et huwa dzoh nunéhulhdzut, 'et whuch'a ne'hoot'en-un hukwa' hut'en.

¹³ 'Et ndunne yuka dune unli-i k'ut ust'úsne, 'enne hoonts'i Moses be 'udustl'us 'aw hik'u nulhe'ust'en. 'Et hoonts'i whuz un'a ooka dune

'ahli-i k'ut nohotit'us whuz nohonilht'i. 'Et ndunóhohinla de, 'et da' whe' hot'e' oole' da'.

14 'Et Sizi Gri tulalhgus k'ut neba dazsai-un, 'et za whdúst'i' whe' hoont'oh. NeMoodihti Sizi Gri ootulalhgus, 'i gha za sdzi do 'úja. 'En bulh dasusai le 'ust'oh. 'Et huwa ndi yun 'ants'i sba whuzdli'. 'Ink'ez si cha 'ants'i whuba usdli suli'.

15 Wheni ts'iyawh Gri Sizi 'en bulh 'uts'int'oh de, 'et de yuka dune unli-i k'ut 'ust'usne, k'us dune lhit'usne, 'et 'ants'i 'uhoont'oh 'et huwa. 'Et hoonts'i wheni mbene la Gri Sizi 'en bulh 'unt'ohne, doo cha za ts'uwhuzdli whe' ts'int'oh.

16 'Ink'ez mbene la ndi khuni 'i gha yuk'úne' 'úst'enne de, 'et de be nedzi dizghel-i, 'ink'ez be negha te'nidzeh-i, 'ohwhi la huyulh oot'e'. Israel oots'u haínzutne, mbene la Yak'usda oodune' unline, 'enne cha.

Yak'usda ye unzoo-i, 'i nohbulh óot'e'

17 'Andit whuts'un 'aw dune dzoh nusoolhdzut junih! Sizi Gri ooba 'ust'en whe dzoh nusúsdzut, 'et huwa syust'e ndulcho whe be hóodat'en whe 'unt'oh.

18 Sulhutsinke, neMoodihti ye unzoo-i, 'i nohbulh oot'e'. 'Et ndo honeh.